

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 मंगलवार

24.09.2024

प्रमुख समाचार –

- 1— प्रदेश म स्वच्छता ही सेवा अभियान के तहत होवत हे आने-आने कार्यक्रम-उपमुख्यमंत्री अरुण साव ह आज रईपुर म स्वच्छता पखवाड़ा के थीम सॉन्ग लांच करीन।
- 2— गृहमंत्री विजय शर्मा ह आज भिलाई म अखिल भारतीय वेटलिफिटिंग क्लस्टर के उद्घाटन करीन।
- 3— राजधानी रईपुर के साईंस कॉलेज मैदान म भारतीय सेना डहार ले पांच अउ छह अक्टूबर के “नो योर आर्मी मेला” के आयोजन करे जाही।

स्वच्छता ही सेवा-सॉन्ग

उपमुख्यमंत्री अरुण साव ह आज रईपुर स्थित अपन निवास कार्यालय म स्वच्छता ही सेवा पखवाड़ा के थीम सॉन्ग लांच करीन। ए गाना म “स्वच्छता परमो धर्मः” ल रेखांकित करत लोगन मन ल स्वच्छता ही सेवा पखवाड़ा म जनभागीदारी बढ़ाय बर प्रेरित करे गेहे। ए मउका म श्री साव ह किहीन कि सहर मन ल साफ अउ सुंदर बनाय बर राज्य के जम्मों नगरीय निकाय मन म सत्रह सितंबर ले दू अक्टूबर तक “स्वभाव स्वच्छता-संस्कार स्वच्छता के थीम म स्वच्छता पखवाड़ा के आयोजन करे जात हे।

ऐति, गौरेला-पेण्ड्रा-मरवाही जिला के कलेक्टर लीना कमलेश मंडावी ह आज कलेक्टोरेट परिसर ले स्वच्छता प्रचार रथ ल हरा झंडा दिखाके रवाना करीन। ए प्रचार रथ “पर्यावरण से नाता जोड़ो-प्लास्टिक का इस्तेमाल छोड़ो” नारा के संग जिला के आने-आने गांव मन म जाके ठोस अपशिष्ट प्रबंधन, सोख्ता गद्दा निर्माण, सौचालय निर्माण अउ ओडीएफ प्लस मॉडल ग्राम बनाय बर लोगन मन ल जागरूक करही।

उहें, बलरामपुर जिला के वाइफनगर विकासखंड के आने-आने ग्राम पंचायत अउ हाट बाजार मन म स्वच्छता कार्यक्रम के आयोजन करे गीस। एमा अधिकारी, कर्मचारी, स्थानीय प्रतिनिधि अउ ग्रामीण मन सामूहिक रूप ले श्रमदान करके स्वच्छता बर लोगन मन ल जागरूक करीन। उहें, रकसगंडा पर्यटन स्थल अउ मंदिर परिसर म घलो जनप्रतिनिधि अउ ग्रामीण मन सफाई अभियान चलईन अउ स्वच्छता के संकल्प लीन।

राष्ट्रमंडल संसदीय संघ

संसद म राखे गे दसवां राष्ट्रमंडल संसदीय संघ भारत क्षेत्र के कार्यकारिणी म तीन ठन राज्य के कमेटी बनाय गेहे। ए कमेटी म छत्तीसगढ़, मध्यप्रदेश अउ राजस्थान राज्य सामिल हरय। जेखर समन्वयक के रूप म छत्तीसगढ़ विधानसभा के अध्यक्ष डॉक्टर रमन सिंह ल चुने गेहे। संसद भवन म आयोजित कमेटी के बइठका म ए निर्णय ले गेहे कि ए तीनों राज्य म एक-एक ठिन संसदीय कारीकरम राखे जाही, जेमा छत्तीसगढ़ म अवइया साल के जनवरी म ए कारीकरम प्रस्तावित हरय। एमा पंचायती राज संस्था, सहरि स्थानीय निकाय, युवा अउ महिला विधायक मन बर आउटरीच कारीकरम राखे जाही। एखरे संग महिला, छात्र अउ युवा मन बर केन्द्रित बिसेस कारीकरम अउ विधायी प्रारूपण म प्रसिक्षण जइसे बिसय घलो ए संसदीय कारीकरम के हिस्सा होही।

मुख्यमंत्री-राष्ट्रीय सेवा योजना

मुख्यमंत्री विष्णुदेव साय काली रईपुर के इंदिरा गांधी कृषि विश्वविद्यालय परिसर म आयोजित राष्ट्रीय सेवा योजना-एनएसएस के राज्य स्तरीय स्थापना दिवस अउ सम्मान समारोह म सामिल होइन। ए दउरान मुख्यमंत्री ह एनएसएस के राज्य इकाई ल कारीकरम के आयोजन बर दे जाने वाला तेरह लाख रूपिया के रासि ल बढ़ाके पचास लाख रूपिया करे के घोसना करीन। ए मउका म मुख्यमंत्री ह किहीन कि एनएसएस के स्वयंसेवक मन ग्रामीण क्षेत्र के संघरा सहरी क्षेत्र म स्वच्छता अभियान, साक्षरता अभियान समेत शिक्षा अउ स्वास्थ्य के क्षेत्र म योगदान देके मिसाल पेस करे हे। ओमन नशामुक्ति बर स्वयंसेवक मन ले सक्रिय भूमिका निभाय के आह्वान करीन।

आयुष्मान कार्ड पंजीयन

आयुष्मान पखवाड़ा के अंतर्गत स्वास्थ्य अउ परिवार कल्याण विभाग डहार ले आज बिलासपुर म कार्यशाला के आयोजन करे गीस। कार्यशाला म विद्यार्थी मनके आयुष्मान कार्ड बनाय बर नगर-निगम स्कूल के शिक्षक मन ल प्रसिक्षित करे गीस। ए दउरान रैली के आयोजन करके योजना के संबंध म लोगन मन ल जागरूक घलो करे गीस। बतादन कि जिला म तीस सितंबर तक आयुष्मान पखवाड़ा के तहत आने-आने गतिविधि राखे जात हे। एखर तहत आयुष्मान चौपाल अउ स्वास्थ्य जांच सिविर लगाय जात हे अउ हितग्राही मनके आयुष्मान कार्ड बर पंजीयन घलो करे जात हे।

माओवादी-मुठभेड़

सुकमा जिला म आज सुरक्षा बल मन संग होय मुठभेड़ म दू जिन माओवादी मनके मारे जाय के खबर हे। घटनास्थल ले बड़का मात्रा म माओवादी जिनीस बरामद करे गेहे। मिले जानकारी के अनुसार चिंतलनार अउ मुकरम कैम्प ले जिला पुलिस बल, डीआरजी, बस्तर फाइटर्स अउ कोबरा बटालियन के संयुक्त टीम करकनगुड़ा अउ तीर-तखार के क्षेत्र म सर्चिंग बर निकले रिहीन। इही दउरान चिंतावागु नदियां के तीर माओवादी मनके जगरगुंडा एरिया कमेटी अउ पीएलजीएल बटालियन ले सुरक्षा बल के मुठभेड़ होगे। ए मुठभेड़ म दू जिन माओवादी मारे गेहे।

वेटलिफिटिंग क्लस्टर

गृहमंत्री विजय शर्मा ह आज भिलाई म अखिल भारतीय वेटलिफिटिंग क्लस्टर के उदघाटन करीन। ए प्रतियोगिता म पैतीस राज्य के एक हजार एक सौ इकचालीस खिलाड़ी हिस्सा लेवत हे। प्रतियोगिता के अंतर्गत योगा, वेटलिफिटिंग अउ पावर लिफिटिंग के खेल राखे जाही। उदघाटन समारोह म मार्चपास्ट अउ खेल मसाल जलाके खिलाड़ी मन सपथ लीन। संघरा प्रतियोगिता के सुभंकर के विमोचन घलो करे गीस। ए मउका म रंगारंग सांस्कृतिक कारीकरम के प्रस्तुति दे गीस।

उदघाटन समारोह ल संबोधित करत गृहमंत्री विजय शर्मा ह किहीन कि छत्तीसगढ़ म पहिली घांव अखिल भारतीय वेटलिफिटिंग प्रतियोगिता राखे जात हे। ओमन खिलाड़ी मन ल सुभकामना देवत किहीन कि पुलिस के जवान अपन प्रतिभा के बल म अंतर्राष्ट्रीय स्तर के प्रतियोगिता म स्वर्ण पदक जीत के देस ल गौरवान्वित करय।

कार्यक्रम म दुरुग सांसद विजय बघेल, जिला के अतिरिक्त पुलिस महानिदेशक विवेकानंद सिन्हा अउ पुलिस महानिदेशक अशोक जुनेजा ह घलो संबोधित करीन।

श्रीराम लला दर्शन योजना

श्री रामलला दर्शन योजना के तहत आज रईपुर संभाग के साढ़े आठ सौ श्रद्धालु मनके जत्था अयोध्याधाम बर रवाना होइस। राजस्व मंत्री टंकराम वर्मा अउ खाद्य मंत्री दयालदास बघेल ह रईपुर रेलवे स्टेसन ले ट्रेन ल हरा झंडा देखाके रवाना करीन। यात्रा के दउरान श्रद्धालु अयोध्याधाम के संघरा वाराणसी म कांसी विश्वनाथ के घलो दर्शन करही।

नो योर आर्मी मेला

राजधानी रईपुर के साईस कॉलेज मैदान म भारतीय सेना डहार ले पांच अउ छह अक्टूबर के “नो योर आर्मी मेला” के आयोजन करे जाही। ए मेला म आम जनता ल सेना के बारे म तीर ले जाने के मउका मिलही। स्कूल अउ कालेज के विद्यार्थी मन ल घलो ए मेला ल दिखाय के व्यवस्था करे जाही। ए मेला म भारतीय सेना के हथियार अउ उपकरण मनके प्रदर्शन होही। संघरा सेना के जवान अपन अद्भूत शौर्य के प्रदर्शन घलो करही। उहें, पांच अक्टूबर के संज्ञा सेना के बैड्स कोति ले पंडित दीनदयाल उपाध्याय सभागार म एक ठिन भव्य म्यूजिकल शो राखे जाही, जेमा जबलपुर अउ वाराणसी ले पहुंचे मिलिट्री बैड अपन प्रस्तुति दीहीं।

एखर पहिली, आज रईपुर कलेक्टर डॉक्टर गौरव सिंह अउ सेना के अधिकारी मन साईस कॉलेज मैदान के निरीक्षण करीन अउ आयोजन ल लेके लोक निर्माण विभाग अउ नगर निगम ल निरदेस जारी करीन।

अरुण साव-कोंडागांव

उपमुख्यमंत्री अरुण साव ह काली कांकेर जिला के चारामा म पैतीस करोड छप्पन लाख रूपिया ले जादा के आने-आने विकास काम मनके भूमिपूजन अउ लोकार्पण करीन। ए दउरान श्री साव ह मनखे मन ले अपील करीन हे कि ओमन सहर ल साफ अउ सुंदर बनाय खातिर स्वच्छता ही सेवा अभियान म अपन भागीदारी निभावयं।

पोषण माह

बलरामपुर जिला म राष्ट्रीय पोषण माह के अंतर्गत जम्मों आंगनबाड़ी केन्द्र मन म एनीमिया, पूरक आहार अउ समग्र पोषण के थीम म आने-आने गतिविधि राखे जात हे। एखर अंतर्गत महिला मन संग एनीमिया उपर चर्चा करके उंखर जांच अउ प्रधानमंत्री मातृत्व वंदन योजना के फायदा गर्भवती महिला मन ल मिलत हे या नइ मिलत हे, एखर जानकारी पोषण ट्रेकर के जरिया ले जात हे।

